



Anastasia Caduff - Casanova, Rueras 1923-2007

bb- *Tras ina val da larmas meina
La criua veta nus carstgauns
E mo l'anguosch'e tem'e peina
Nus accumpognan sin tuts mauns;*

ha in poet sursilvan secret avon biars onns sur da sia veta ch'era fixada d'in criu destin. Tgei patratgs havess l' Anastasia mess en rema, sch'ella havess saviu far quei, per dar in sguard anavos sin sia veta. Sco quei che nus savein comprender, plitost entginas lingias da speranza, da prender la veta sco la sedat e far il meglier ordlunder. Carteivel tschintschassen quellas dalla fidanza da Diu, da crer en las atgnas forzas e prender tut in suenter l'auter.

L'Anastasia Caduff - Casanova era ina femna che ha, malgrad las fridas dalla veta, saviu prender il destin e mirar anavon. Buca mintgin ha quella forza da vegnir a frida cun quei che passa ina veta ora. Mintgin da nus ha sias fridas en quei interval ch'el ei cheu sin tiara e mintgin da nus sedosta sco el sa e po. Ina da sias construcziuns usitada era savens «Ah, tgei, tgei quei va schon». Ella ei insumma stada ina dunna practica e cun sia demanonza fina saveva ella far far survetschs senza ch'ins vess giu il sentiment ch'ella camondi entuorn ins. Oz schessen ei ella hagi giu scharm ni carisma.

Mo quels duns ha ella era duvrau. Ella ch'ei vivida varga 80 onns ha giu dis da sulegl e plievgia. L'atgna sanadad ha meinsvart dau da sbatter. Ella che ha giu in affon mendus, in affon ch'ei ius sez ord quest mund, che ha piars il mariu gia avon entgins onns, ha saviu prender bia da quei cun quei patertgar positiv e mirar anavon ed aschia dumignar a purtar il destin. Nov affons han dau lavur, fetg bia lavur, e tschentar tuts sin punt tochen che mintgin ha saviu star sin agens peis ha buca mo pretendiu quella lavur, quei ha era custau quitaus, panzieris e la curascha da schar ira, schar sesviluppar mintgin tenor las atgnadads ed habilitads dad in e scadin. La feglia Bernadetta, impedita da naschientscha enneu, ha denton forsa gest cun siu impediment ligiau la famiglia ensem. La mort dil fegl Linus igl onn 1989 ei stada pli che

ina greva frida. Mo cun mirar anavon e sperar ch'il niev di porti levgera ein quellas fridas vegnidas surmuntadas.

Sco persuna era ella ina femna semper en furtina, mo malgrad la gronda furtina, tuttina temps da far ina buna paterlada denter vischinas. Siu lungatg da Vrin ha ella mai dau si, paucs plaids tujetschins han pudiou denteren. Sevilar gliez saveva ella era, lu mordio, mo strusch era la malaura vargada er'ei vargau. Cheu vegnev'e buca aunc pundau suenter.

L' Anastasia Caduff ei naschida amiez la primavera digl onn 1923 enta Vrin. Siu bab ei staus Gion Mathias Casanova e la mumma Onna Maria Caminada. Els han giu 7 affons. Da quels ei la Stasia la davosa ch'ei ida encounter als geniturs. Ton sco ins sa fagevan ils geniturs il pur. Vrin, entademdem la Lumnezia era da quels onns aunc pli isolaus che nossa Val Tujetsch, las relaziuns da viver aschi presapauc sco cheu e sco tuts affons da quella generaziun ei la lavour, il segidar era stai enta Vrin avon maun. Suenter il temps d'affonza e scola ha la Stasia giu duas plazzas. Ina a Glion e suenter a Rueras en l'ustria dalla posta tier la famiglia Brugger. Quei ei stau destin. Destin perquei che cheu ha ella entupau il Nazi Caduff. Ella ina matta cun temperament ed il Nazi in um legher e dalla buna cumpignia ein s'acordai, han giu la curascha e fundau famiglia igl onn 1952. Denter 1953 e 1968 han els astgau beneventar 8 affons. Ina tala famiglia ha pretendiu bia. Tiels Nazi fravis er'ei adina truscha, ina canera, in ir ed in vegnir, propri veta da famiglia sco ei regeva en bia casas d'avon onns.

Ils emprems onns han els fatg il pur. Suenter ver dau si quella clamada ha il Nazi surpriu diversas lavurs tier differentas firmas. Perfin ad alp eis el staus cun ses buobs, denton quei ha tunschiu per ina stad. La criua aura da lezza stad ha medegau el da quella carriera. Era per mumma Stasia vegn quei ad esser stau pli che mo in quitau per siu um e ses affons. Nua ch'els han entschiet han els era calau: El temps da pensiun ha igl um turnau a far il pur. Cun entginas nuorsas han ei fatg ira il temps enstagl star a bandun e spitgar sin la vegliadetgna. 1988 han els vendiu la casa, baghegiau casa nova si las Sorts e setratgs si leu. Nua ch'ella ei restada ensemes cun la feglia Bernadetta aschi ditg sco la sanadad ha schau tier.

Igl onn 2001 ha ella priu dimora en casa s.Vigeli a Sedrun. Cuntenta sco adina ha ella gudiu la tgira, las visetas, la cumpignia e schau puppergnar. Cuntenta eis ella era stada savend che la feglia Bernadetta seigi en buns mauns. Aschia ei il temps da vegliadetgna semussaus pli e pli fetg, ils discuors vegni pli scarts, la memoria svanida tec a tec ed ella ha saviu sedurmentar en il mardis ils 2 da schaner e turnar tier il bien Diu. Possi ella ruassar en pasch e nus sperein da seveser.